



Parlamentarna komisija odgovorna za reviziju  
Parlamentarno povjerenstvo odgovorno za reviziju

Парламентарна комисија одговорна за ревизију

Broj: 04/1-02-2159/25-3  
Sarajevo, 12. 12. 2025. godine

## ČLANOVIMA PARLAMENTARNE KOMISIJE ODGOVORNE ZA REVIZIJU

Dana 27. 11. 2025. godine održana je 25. sjednica Parlamentarne komisije odgovorne za reviziju Parlamenta Federacije BiH (u daljem tekstu: Komisija). Sjednici Komisije prisustvovali su svi članovi Komisije i samim tim ispunjeni su svi uslovi za punovažan rad u pogledu kvoruma i odlučivanja. Pored članova Komisije, na 25. sjednici Komisije prisustvovao je i Mirza Kudić, generalni revizor Ureda za reviziju institucija u Federaciji BiH.

Predsjednik Komisije je predložio **dnevni red**, koji je jednoglasno usvojen, a koji glasi:

1. Usvajanje zapisnika sa 21. sjednice Parlamentarne komisije odgovorne za reviziju,
2. Usvajanje zapisnika sa održanih javnih saslušanja, odnosno sa 22., 23. i 24. sjednice Parlamentarne komisije odgovorne za reviziju,
3. Pripreme aktivnosti za izradu Izvještaja Parlamentarne komisije odgovorne za reviziju o revizorskim izvještajima revidiranih subjekata i korisnika budžeta Federacije Bosne i Hercegovine za 2024. godinu ,
4. Tekuća pitanja.

Na osnovu člana 44. Poslovnika Predstavničkog doma i člana 41. Poslovnika o radu Doma naroda, a u vezi sa članom 54. Poslovnika Predstavničkog doma Parlamenta Federacije BiH i člana 52. Poslovnika o radu Doma naroda Parlamenta Federacije BiH, Komisija podnosi sljedeći:

### IZVJEŠTAJ

1. **Usvajanje zapisnika sa 21. sjednice Parlamentarne komisije odgovorne za reviziju**

Komisija je razmatrala zapisnik sa 21. sjednice Parlamentarne komisije odgovorne za reviziju i jednoglasno ga usvojila.

2. **Usvajanje zapisnika sa održanih javnih saslušanja, odnosno sa 22., 23. i 24. sjednice Parlamentarne komisije odgovorne za reviziju**

Predsjednik Komisije je upoznao članove Komisije sa drugom tačkom dnevnog reda koja se odnosila na usvajanje zapisnika sa održanih javnih saslušanja, odnosno sa 22., 23. i 24. sjednice Parlamentarne komisije odgovorne za reviziju. Pozvao je članove Komisije da iznesu

eventualne primjedbe i prijedloge na dostavljeni zapisnik, te budući da ih nije bilo, isti je stavio na glasanje. Nakon glasanja predsjednik je konstatirao da je Zapisnik sa održanih javnih saslušanja, odnosno sa 22., 23. i 24. sjednice Parlamentarne komisije odgovorne za reviziju jednoglasno usvojen.

### **3. Pripremne aktivnosti za izradu Izvještaja Parlamentarne komisije odgovorne za reviziju o revizorskim izvještajima revidiranih subjekata i korisnika budžeta Federacije Bosne i Hercegovine za 2024. godinu**

Predsjednik Komisije je konstatirao da su, u okviru pripremnih aktivnosti za izradu predmetnog Izvještaja, sekretari Komisije putem elektronske pošte članovima dostavili radnu verziju materijala.

Predsjednik je naglasio da je radna verzija Izvještaja strukturirana u skladu s ranije primjenjivanom metodologijom, te da isti trenutno ne sadrži prijedloge zaključaka, koji će biti predmet naknadnog usaglašavanja i usvajanja od strane Komisije.

Nakon uvodnog izlaganja, predsjednik je otvorio raspravu i pozvao članove da iznesu svoje prijedloge i primjedbe na dostavljeni materijal, kao i da predlože konkretne zaključke za uvrštavanje u konačan tekst Izvještaja Komisije.

U diskusiji je učestvovala članica Mirjana Marinković-Lepić, koja je predložila da se u Izvještaj uvrste zaključci usmjereni na rješavanje problema kadrovske podkapacitiranosti u određenim ministarstvima. Istaknula je da je problem otežanog zapošljavanja novog kadra identificiran na javnim saslušanjima predstavnika tri ministarstva, uključujući i Federalno ministarstvo zdravstva.

Nakon opsežne rasprave i razmjene mišljenja, predsjednik Komisije je predložio da članovi Komisije svoje pisane prijedloge zaključaka, koji će biti razmotreni i uvršteni u Izvještaj Parlamentarne komisije odgovorne za reviziju o revizorskim izvještajima revidiranih subjekata i korisnika budžeta Federacije Bosne i Hercegovine za 2024. godinu, dostave sekretarima Komisije u roku od 20 (dvadeset) dana od dana održavanja ove sjednice.

Navedeni prijedlog predsjednika Komisije je jednoglasno podržan od strane svih članova.

### **4. Tekuća pitanja**

U okviru ove tačke dnevnog reda, član Komisije, Mirsad Zaimović, obratio se generalnom revizoru Ureda za reviziju institucija Federacije Bosne i Hercegovine, g-dinu. Mirzi Kudić.

On je istakao da je, u skladu sa važećim zakonskim propisima i dosadašnjom praksom, Ured za reviziju institucija Federacije BiH redovno dostavlja Parlamentarnoj komisiji odgovornoj za reviziju plan revizija institucija za narednu godinu.

Nadalje, ukazao je na zabrinutost zbog potencijalnog političkog utjecaja na rad Ureda za reviziju u prethodnim periodima. Naglasio je da je, uslijed politički vođenih namjera, dolazilo do tendencioznih zahtjeva za reviziju od strane pojedinih zastupnika Parlamenta Federacije Bosne i Hercegovine, te da je Ured za reviziju, prema raspoloživim informacijama, postupao po takvim zahtjevima.

S ciljem osiguranja transparentnosti i sprječavanja budućih politički motiviranih obračunavanja putem zahtjeva za reviziju, gospodin Zaimović je zatražio od Ureda za reviziju da Komisiji dostavi sveobuhvatan pregled:

- izvršenih revizija po zahtjevima na nivou lokalnih zajednica za 2025. godinu, kao i plan istih za 2026. godinu (uključujući i javna preduzeća);
- informacije o vremenskim razmacima izvršenih revizija kod istog subjekta revizije.

Zaključno, podvukao da je od krucijalne važnosti onemogućiti bilo kakav politički utjecaj na proces revizije te u potpunosti zadržati i zaštititi neovisnost Ureda za reviziju institucija Federacije Bosne i Hercegovine.

Također je izrazio sumnju u vezi s povećanim brojem pozitivnih mišljenja Ureda za reviziju na izvještaje revidiranih subjekata u 2024. godini u odnosu na prethodne godine. On je istakao da je malo vjerovatno da je u tako kratkom vremenskom periodu došlo do značajnog i stvarnog napretka u radu revidiranih subjekata koji bi opravdao ovakav trend pozitivnih mišljenja.

Generalni revizor se svom odgovoru složio sa konstatacijom da je ključno spriječiti bilo kakav politički utjecaj na rad Ureda za reviziju. Potvrdio je da zahtjevi za vršenje revizije koji dolaze na inicijativu pojedinih zastupnika predstavljaju veliki rizik s kojim se Ured susreće u svom radu.

Generalni revizor je pojasnio da Ured za reviziju postupa po navedenim zahtjevima primjenom standardizirane interne matrice rizika, čija će primjena biti jasnije predočena Komisiji nakon što se dostavi traženi pregled izvršenih revizija.

Povodom navoda o većem broju pozitivnih mišljenja, generalni revizor se nije složio s tom ocjenom. Naprotiv, istakao je da je Ured za reviziju u posljednjem periodu pooštrio kriterije revizije, te da su za prethodnu godinu imali veći broj negativnih mišljenja na finansijske izvještaje revidiranih subjekata u odnosu na raniji period. Kao dokaz pooštrenih kriterija, spomenuo je da su i pojedini neovisni mediji izvještavali o ovoj temi.

Jedina izmjena koja je primijenjena, a u skladu je sa utvrđenom metodologijom, odnosi se na tretman preporuka koje su se godinama ponavljale, a koje subjekti revizije nisu mogli implementirati, jer se iste odnose na izmjenu propisa ili slično koji nisu u njihovoj direktnoj nadležnosti (npr. izmjena zakona ili podzakonskih akata).

Nakon izlaganja generalnog revizora, predsjednik Komisije je dao riječ članu Komisije, Muameru Zukiću.

On je istakao da se na održanim javnim saslušanjima moglo uočiti kako se revizija kod pojedinih subjekata provodila na temelju uzorka poslovanja. Naglasio je da su i u okviru tako ograničenog uzorka uočene značajne nepravilnosti i neregularnosti.

Konstatirao je da bi sljedeći logičan korak trebala biti sveobuhvatna revizija, koja međutim trenutno nije moguća. Kako je Ured za reviziju ranije obavijestio Komisiju, provedba sveobuhvatnih revizija otežana je zbog nedovoljne kadrovske popunjenosti.

S obzirom na to da se približava usvajanje Budžeta Federacije Bosne i Hercegovine za 2026. godinu, gospodin Zukić je predložio da Komisija podrži inicijativu za zapošljavanje novih kadrova u Ured za reviziju, čime bi se osigurali potrebni resursi za efikasniji rad Ureda u narednom periodu.

**ZAMJENIK PREDSJEDNIKA  
PARLAMENTARNE KOMISIJE  
ODGOVORNE ZA REVIZIJU**

**Elvir Karajbić, s.r.**

**PREDSJEDNIK  
PARLAMENTARNE KOMISIJE  
ODGOVORNE ZA REVIZIJU**

**Damir Džeba, v.r.**